

AUM EAXTN IS S MA R ONE DIA

aum eaxtn is s ma r one dia
um fire in da frua
waun d easchtn aumschln schrein

i bring ka aug ned zua
en dera weißn frua
waun s fire schlogt
und ole aumschln schrein

i kent ma s heazz ausreißn
um fire in da frua
und auf de gossn schmeißn
waun d aumschln schrein

en suma en da frua
alanech
one dia
und d aumschln schrein

en suma en da frua
waun d aumschln schrein
und de sun hinta da donau
frischqoschna r aufschdeigt..

alanech
one dia
en dera weißn frua...

WINDRADAL

kauft s ma r a windradal
und dazz ma s auf s grob
das e s hea wia s schnuad
und suad
en meazz und abrüü
das e s hea wia de luft is
en da zeid noch mein dod..

waun e daun a r engl wia
woxn ma gleich weiße fligaln
aus mein gatschechn hemt..
waun e owa r a deifö wia
kuman ma rode schwingaln
aus meina assfaltanan haud!

daun fliag e wia r a schotn

und i fliag wia r a schotn
aus n meazz en abrüü en abrüü
aus n abrüü en mei en mei
aus n mei en june en june
aus n june en jule en jule
aus n jule en august en sebtamba..

sebtamba sebtamba sebtamba

und kana wiad me seng
und kana wiad me hean
und nimaund wiad song:
duat fliagta grod fabei..!

sebtamba okdowa nofemba

owa gschbian weat s me ole:
(du und du *und du aa..*)
jenochdem wos e bin:
a r *engal* fola gadsch –
oda r a *deifö* foi assfalt...

3

hosd as ned kead
mei schdimm en da nocht
mei schdimm aus de bam
aus d ladean aus de blaln
aus de dred aus n gros..?

hosd as *ned* kead
mei schdimm en da nocht
wia s wia r a schdandal
aun dei fenzta gitscht?
mei schdimm en da nocht
waun s d grod zua hosd?

hosd as *ned* kead
mei schdimm en da nocht
wia s wia r a binan

iwa dein bet sumd?
mei schdimm en da nocht
waun s d grod offm hosd?

hosd no *nii* en da nocht
mei schdimm kead
wia s ima r und ima
one aufzhean
dein nauman sogt...?